

# 25 onns PSR – ina giubilara fitg activa

Cun avair bleras ideas e dar novs impuls

■ **(anr/gc) Per venderdi passà ha la Pro Svizra Rumantscha (PSR) convocà commembras e commembers a la radunanza giubilara per ses 25 onns en la Tschalera (Hofkellerei) sin la Curt a Cuira.** Commembers èn vegnids en dumber sco gia daditg betg pli e vitiers anc blers interessads vi da la debatta davart ideas per il futur dal rumantsch. En egl è dà – e quai è sta zunt legraivel ed empermettent – che blers giuvens e giuvnas eran preschents ed han qua tras demussà grond interess per l'activad da la PSR.

## Vast program en la retro- e prospectiva

Avant in onn ha in team da giuvens e giuvnas – sut il co-presidi dad *Annetta Zini* e *Flurin Bundi* – surpiglià la responsabladad per la PSR e sviluppà in'activad da smarvegl.

Per la PSR èsi impurtant – e quai ha ella gia fatg – da tgirar buns contacts cun autras uniuns da Rumantschs sco quels en la Bassa, cun la GiuRu (Giuventegna Rumantscha) ed era cun la Pro Grigioni Italiano.

Ses postulat, numnadamain quel dal barat da classas (ina classa sursilvana va en l'Engiadina ed ina da là vegn en Surselva) è gia sin buna via per quest atun. – Engaschada fitg è la PSR era per La Quotidiana (sia intenziun oriunda) cun dar sustegn finanziel (6000 francs) ed aschia pudair gudagnar 80 abunents. Ina segunda fasa sumeglianta suonda questa stad. Il schefredactor da LQ,

*Martin Cabalzar*, è stà fitg engraziaivel persuerter.

La suprastanza vegn a far – en connex cun 80 onns rumantsch sco lingua nazunala (2018) e 100 onns Lia Rumantscha (2019) – patratgs davart la «Rumantschia 2020» cun ideas novas per ina lingua veglia. Postulads vegnan concretamain: ina maisa radunda davart las medias rumantschas, ina cumissiuin per la cunvivenza da linguas sin plaun federal, contacts cun autras instituziuns per la politica da linguatg e procurar in telefonin sco plattafurma digitala cun ina

fatscha rumantscha. Vitiers vegn anc ina revisiun dals statuts.

## Quint cun sperdita – ma solida basa finanziaria

L'entrada principala deriva da las contribuziuns dals commembers – en tut èsi stà 7550 francs. Il quint serra cun expensas da 13 665 ed entradas da 7560 francs, pia cun in surpli da sortidas da 6100 francs. La facultad munta anc adina a 47 660 francs.

Il quint vegn sancziunà sin proposta dals revisurs *Nicolina Cathomen* e *Beat Hosang*, vegnids reelegids per in'ulteriu-

ra perioda d'uffizi. La contribuziun annuala per singuls, giuvenils, famiglias e persunas giuridicas resta nunmidada.

## Prestà fitg buna lavur

La radunanza da commembers da la PSR giubilara – cun las tractandas statutaricas e la suandanta viva debatta tras referats e discussiun sur dal rumantsch en l'avegnir – è stada bain preparada e sa splegada speditivamain. Ins ha sentì gronda cuntentientscha cun l'agir da la suprastanza ed admirà ses engaschi considerabel per dar da princip novs impuls al rumantsch insumma.



**Johannes Flury, il president dalla Lia Rumantscha, ha medemamein reagiu sils impuls che la PSR ha presentau cul pupi «Rumantschia duamel-li e vegn».**

FOTOS S. ROTHMUND